

Mid-Day Dogri News Bulletin, 18th July 2024

समे – 12:25

<><><><><><>

JK-Doda Encounter

खीरी खबरां थोने तगर दपक्खी गोलीबारी जारी ही। डोडा दे देसा ते एहदे आले दीआले दे जंगलें च तपाशी अभियान चलाया गेआ हा। एह तपाशी अभियानसोमवार ते मंगलवार दी मझाटली रातीं सुरक्षा बलें ते आतंकवादिएं बश्कार होए दे टाकरे गी दिक्खदे होई चलाया गेआ। इस टाकरे च 4 फौजी जवान शहीद होए हे जेहदे च इक अफसर बी शामिल हा। होर ब्यौरे गी अजें बलगेआ जा'रदा ऐ।

<><><><><><>

Doda-OGW Arrest

जम्मू कश्मीर पुलस नै डोडा जिले च होए दे आतंकवादी हमले दे सरबंधै च आतंकवादी संगठन थमां बाहर रेइयै उंदे लेई कम्म करने आले ओवर ग्राउंड वर्करें दे गिरोह दा पता लाया ऐ। इस दरान 4 ओवर ग्राउंड वर्करें गी गिरफ्तार कीता गेआ। आकाशवाणी जम्मू संवाददाता दी रिपोर्ट मूजब पुलसै हाल दे आतंकवादी हमलें दी पछोकडै च कारवाई चलाई। पुलस नै 12 जून गी गंदोह पुलस थाने च केई दफाएं तैहत एफआईआर दर्ज कीती ही। मगरा पुलस आस्सेआ कारवाई शुरू कीती गई। इस दरान ओवर ग्राउंड वर्करें मुबशिर हुसैन, सफदर अली ते सज्जाद अहमद गी गिरफ्तार कीता गेआ। एह लोक इसलै पुलस दी हिरासतै च नं गंदोह पुलस थाने च 26 जून गी इक होर एफआईआर दर्ज कीती गई ते शौकत अली गी गिरफ्तार कीता गेआ। ओह पुलस दी हिरासत च ऐ ते अगड़ी जांच-पड़ताल कीती जा'रदी ऐ।

<><><><><><>

54 PRC-Workshop

पिंशने सरबंधी मामले ते पिंशनी आई चुके दे मलाजमें दी भलाई बेह्तरी सरबंधी मैहकमा इस म्हीने दी 19 तरीक गी जम्मू दे कन्वेंशन सेंटर च रटैरमेंट कोला पैह्ले आले परामर्श सरबंधी 54मीं कार्जशाला दा सरिस्ता करा करदा ऐ।

एह कार्यशाला प्रधानमंत्री हुंदे दफतरे च राज्यमंत्री ते पिंशनरें ते कार्मिक मामले दे मंत्री डॉ. जितेन्द्र सिंह हुंदी मजूदगी च लोआई जाग। इस कार्यशाला च निकट भविक्ख च रटैर होने आले मलाजमें गी पिंशन मंजूरी दी प्रक्रिया ते रटेरमेंट दे बाद हासल होने आले फायदे दे बारे च जागरूक कीता जाग। मैहकमा केन्द्र सरकार दे मलाजमें लेई इस चाल्ली दे कार्यक्रम आयोजत करदा ऐ तां जे उनेंगी रटैर होने कोला पैहले गै सारी प्रक्रियाएं दे बारे च दस्सी दित्ता जा तां जे समें सिर उंदी पिंशन बी लग्गी जा ते कन्नै रटैर होने दे बाद आले सारे लाह बी एह मलाजम हासल करी सकन। इस कार्यशाला च केन्द्र सरकार दे रटैर होने आले ते सीएपीएफ दे रटैर कोई ढाई सौ मलाजमें दे हिस्सा लैने दी मेद ऐ। इस दरान भविष्य पोर्टल, संगठित पिंशनर पोर्टल, फमली पिंशन, रटैरमेंट दे बाद आले लाह, इंकम टैक्स नियम, अनुभव, डिजीटल लाइफ सर्टीफिकेट, पैहे दे निवेश ते इस चाल्ली दे बक्ख-बक्ख विषयें पर विशेष सत्र लोआए जांगन जिंदे राएं इनेंगी पूरा पूरा लाह दोआने हासल करने च सखाल होग।

<><><><><><><><>

SC-NEET Hearing

सुप्रीम कोर्ट च अज्ज नीट अंछर ग्रेजुएट 2024 मतेयान दे विवाद कन्नै जुडी दिएं याचिकाएं दी सुनवाई तैह कीती गई ऐ। एहदे शा पैहले जंदी 11 जुलाई गी सर्वोच्च अदालतै एह मतेयान रद्द करने परतियै मतेयान करोआने ते इस मतेयान दे आयोजन च कथित गड़बड़िं दे मामलें सनें सब्बनें याचिकाएं पर सुनवाई स्थगित करी दित्ती ही। अदालतै केन्द्र सरकार ते एनटीए दी तरफा किश धड़ें गी जोआब नेई दित्ते जाने गी दिक्खदे होई सुनवाई अगड़ी पाई दित्ती ही। प्रधान न्यायधीश डी.वाई.चन्द्रचूड, न्यायमूर्ति जे.बी.पारदीवाला ते न्यायमूर्ति मनोज मिश्रा हुंदी खंडपीठ 40 शा मती याचिकाएं पर सुनवाई तैह ऐ। इंदे च बक्ख-बक्ख हाई कोर्टें च बकाया मामलें गी सुप्रीम कोर्ट च भेजने दे सरबंधें च एनटीए दी तरफा दायर कीती गेदियां याचिकां बी शामिल न।

<><><><><><><><>

JK-Amarnath Yatra

जम्मू दे भगवती नगर आले आधार शिविर थमां 4 जहार 383 श्रद्धालुएं दा 21मां जत्था अज्ज बडलै श्री अमरनाथ जी दी यात्रा लेई घाटी लेई रवाना होआ।

एह सारे श्रद्धालु 157 गड्डिडएं दे काफले च सुआर होइयै अगड़ी यात्रा लेई रवाना होए। इस जत्थे च 2 जहार 222 मर्द, 1 जहार 71 महिलां, 8 बच्चे, 67 साधु ते 15 साध्वियां शामिल न। कुल 4 जहार 383 श्रद्धालुएं चा 1 जहार 701 बालटाल लेई ते 2 जहार 682 पहलगाम लेई रवाना होए, जित्थुआं ओह अपनी अगड़ी यात्रा लेई रवाना होंगन। कल 13 जहार 3 सौ श्रद्धालुएं पवित्र गुफा च हिमलिंग दे दर्शन कीते। यात्रा शुरू होने थमां लेइयै अजे तगर 3 लख 51 जहार 523 श्रद्धालुएं बर्फू कन्नै बने दे शिवलिंग दे दर्शन कीते न। 42 दिनें तगर चलने आली एह यात्रा 29 जून गी शुरू होई ही।

<><><><><><>

Director Agriculture

राई-बाई दी पैदावार सरबंधी निदेशक अरविंदर सिंह ते सांबा दे मुख्ख राई-बाई अधिकारी होरे सांबा जिले च चला'रदे बक्ख-बक्ख राई-बाई परियोजनाएं दा व्यापक जायजा लैता। इस दरान निदेशक होरे खुम्बे दी पैदावार आली इकाई दा जायजा लैता। इसी युवा उद्यमी पुषपिंदर सिंह हुंदे आस्सेआ कायम कीता गेआ ऐ। निदेशक होरे आखेआ जे नियंत्रित माहौल च तैआर कीती फसल तुसें गी बद्धोबद्ध लाह ब'रे भरै लेई उपलब्ध करोआंदी ऐ। पूरी समझ ते योजनाबद्ध तरीके राएं करसान ब'रे भरै च 5 फसलां हायल करी सकदे न, जेह्दे च 2 मौसमी फसलां ते त्रै बे-मौसमी फसलां शामिल न। एह्दे राएं करसान अपनी आमदन गी दूना करी सकदे न।

<><><><><><>

Sherya-Commonwealth Junior

जम्मू कश्मीर दी इक नामवर तलवार बाज श्रेया गुप्ता नै न्यूजीलैंड दे क्राइस्ट चर्च च चलै करदी राष्ट्रमंडल जूनियर ते कैडेट चैंपियनशिप 2024 च तलवार बाजी दी साब्रे श्रेणी च अंतर्राष्ट्रीय सतह पर पैहला पैहला तगमा अपने नां कीता ऐ। आकाशवाणी जम्मू संवाददाता दी रिपोर्ट मूजब शुरूआती मकाबले च शानदार प्रदर्शन करदे होई उनें इंग्लैंड दी सौंडर्स निकोल गी 15-3 कन्नै हराया, ओह्दे बाद मैडल दे मकाबले च रेया नै आस्ट्रेलिया दी हार्डगे गाला गी 15-13 कन्नै हराइयै कैह दा तगमा पक्का करी लेआ।

ओह्दे मगरा मैडल आले मकाबले च श्रेया नै आस्ट्रेलिया दी खडारी गी 15–13 कन्नै हराइयै
कैह् दा तगमा पक्का करी लैता। ओह्दे मगरा खेड्डे गेदे सैमी फाइनल च श्रेया गी सिंगापुर
दी जुलिअट माइंड नै हराई दित्ता।

<><><><><><>